

DIARIO *den Carnaval 63*

Tumba Contest 2017 dedica na Andres Tromp y Rodney van der Biezen



ORANJESTAD (AAN)- Diasabra awor lo tin e tan comenta y tan gusta, tumba contest den Aruba Entertainment Center. E anochi aki ta conta cu un total di 25 tumba acompaña pa 9 banda musical. E evento lo cuminsa pa 8'or di anochi y e anochi lo cera cu ambiente di Rey di Tumba 2016 cu ta Jerino Bass y D'Licious.

E aña aki e di 47 Festival di Tumba ta wordo dedica na Andres Tromp y Rodney van der Biezen, dos gran musico cu a sa di contribui grandemente na Aruba su tumba festival y na musica engeneral.

Pueblo di Aruba engeneral ta keda invita pa e magno evento aki y pa asina apoya tur e participantenan y engrandece nos festival di tumba.

**Andres Tromp
Trompetista y
Trombonista
pa varios banda**

Andres Tromp no ta un

desconoci den e mundo farandulero aki na Aruba. E ta un persona cu cuminsa toca trompet den brassband cu Rufo Odor (q.e.p.d) pa 2 aña. Na 1975 el a milita den Vibracion 74 como trompetista, coro y sound man. E ta corda cu durante un tumba contest el a haye ta cambia di trompet pa valve trombone, y cu tempo esey tambe a wordo cambia pa bass trompet.

Andres a milita tambe den e bandanan grandi di antes manera Triple S, Doble Sabor, Sound and Harmony, Papito y su Doble Sabor y Dejavu y a compaña varios di e bandanan aki pa Corsow, Bonairo, Sint Maarten, Santo Domingo, Calle 8 na Miami y Hulanda.

E ultimo toca di Andres tabata aña pasa December cu el a compaña Papito y su Doble Sabor y Doble R.

Andres Tromp ta casa cu Marian Tromp-Thode y nan tin 3 yiu, Gianni, Ruisandro y Elton.



**Rodney v/d Biezen
Pianista/Arreglista**

Rodney a cuminsa atende les di piano cu su 11 aña serca diferente docente di piano te na edad di 19 aña. Na su edad di 19 el a atende un Summer school na Berklee College of Music na Boston, Massachusetts.

Despues a sigui atende lesnan di harmonia y areglo na Arubaanse Muziekschool bao guia di sr. Felix "Chucho" Hoek y tambe serca sr. Franklin Grandadillo te na su edad di 26 aña. Den su trayectoria musical, Rodney a toca steelband na hotel pa 4 aña largo den grupo di sr. Francis Jacobs. Cu su 16 aña a cuminsa toca Keyboard den the New Dimension, despues a sigui den La Nueva Fuerza y despues a pasa pa piano hunto cu Vicente Kelly y Sus Pimentosos.

Na aña 1993 Rodney a milita den Orquesta EQO Exitante y aki den a bira Director Musical pa prome biaha di un orquesta.

Despues a sigui toca cu e maestro Robert Jeandor y su Solo Banda Show pa 3 aña y un paar di aña despues a pasa over pa Director Musical di Orquesta Search di Sr. Meiller Lourens q.e.p.d.. E tabata ta tambe, pianista/arreglista y Director Musical di Orquesta On Cue, y tambe a milita den banda Tsunami como arreglista y piano/Keyboard player. Rodney tin 2 aña awor como Director Musical di e All Star Band di Tumberito y tambe ta forma parti di e All Star Band di Vozilandia Escolar. E aña aki Rodney ta cumpliendo 25 aña den farandula tocando den orquesta y festivalnan aki na Aruba.